

五

録事詩



文錄事詩序

文錄事詩者上林錄事文先生基聖作也

吳中雖稱四姓矣然文獻望族必首雁門

皇朝自涑水公而下世_二受仕亦世_二受

詩_二迨太史公最盛 黃屋之下白屋之

上三韓日南島言文身之域鬼方流沙雕

結雕題之壤聞文太史公名如魯尼父泗



州僧伽然先生為博士壽承公冢子於太
史公為冢孫耳濡目染掇其芳而咀其華
神情蕭散外溫內朗舞勺之年占對竒絕
間為韻語超二玄著二父愛之特甚並著
邾前賓客見者莫不錯愕相顧指為文舉
德祖之流少籍博士弟子後游太學十上
公車而不獲一第會先生少子從龍舉孝

廉先生慨然曰余髡有霜矣而與孺子角
逐鈿槩豈不童之心也哉乃謁選春官授
上林苑錄事上林號閒曹職多堯雉兔池
沼園囿獸圈水衡諸務官署去都城三舍
而遠每朝朔望歸坐堂皇視事畢趣呼捲
簾對燕山雲霞與聽啼鳥課僮子掃落花
耳先生樂其官謂可吏隱二三執政皆先

生故人他王公卿士無不知文上林名爭
為薦拔欲寘之禁近先生一夕思歸不可
留或勸使少湏可不陸沉先生不可曰上
林官誠薄然列在交戟之內選人爭欲得
之此可染指而不可濡足以窒後來者路
也既得請致仕歸則葺治太史公舊廬花
竹琴書翛然遠俗先生無所事 = 但瞑目

擁糶嗒然而已郡邑大夫以干旄往悉謝
不見日與弟郡丞君及羣從子姓嫻黨舊
知相燕樂不知白版之外轍迹幾何也先
生詩標意而黜辭尚理而遠格先情而後
才首風旨而薄聲調貴自然而略纂組評
者以為左司香山之間先生自謂托物寄
興聊復爾耳奚暇學步效顰乎昔在鄒韋

氏晉王氏並以詩文世其家黻纓綦矣者
累代不絕文之諸公庶幾似之然彼不聞
有掛冠縣車之風有則史胡以不書文氏
自涑水中丞公以來若太史若博士若學
正若上林若郡丞上疏乞骸骨者先後相
踵無不款段下澤優游林藪而先生與郡
丞又皆善飯無恙白首相驩二疏大夫何

忝焉先生雖自比王恬吾意恬之文與宦
先生不之先生之高非恬所有矣太原王
穉登序

文錄事詩集

上林錄事文 肇祉 基聖

四言古詩

悠悠厥初篇 述祖德也

悠悠厥初爰自西伯以謚為氏系用以翼漢有蜀守
 聲名洋溢學校聿修民沐其澤若晉儒林文學藉藉
 有唐節義光于史冊 維指使後歷世徵庸宋至寶
 佑篤生信公義盡仁至大顯貞忠迨我始祖宋咸淳
 中宣教衡州是為衡宗衡岳廬陵譜牒寔通 衡山
 之麓廼世其族金紫大夫猶食宋祿載世元季廼易
 武服佩金虎符武昌振肅 國兵既下鎮遠繫獄赦
 長千夫戎勲備錄 長子驍健入侍 高皇剪平偽漢

特被寵光賜名錫服厥族用彰時八世祖從兄平揚
職充散騎徙居蘇杭蘇之有文寔自衡陽 我祖存
心占籍長洲皇矣涑水敷教優柔甲科繼起恩渥寵
褒牧伯中丞世濟其休顯顯祖考作德好修薦修國
史翰苑名流 我父是承世德克存南北二雍桃李
盈門嗟余寡陋宿好是敦述此祖德貽我子孫
悠悠厥初五章章十二句

巍巍岱山 登泰山觀日出也

巍巍岱山五岳之宗蟠九百里上有秦封 巍巍岱
宗元君有宮俯視下邑鳧繹龜蒙 載登天門層巒
蔽空秦觀在西日觀其東梁父左控石閭右通 載
登高峯憇于石室卧聽松濤夜觀日出蓬瀛海島周

覽惟悉 瞻彼同巖羣仙並列叩彼金童受我寶訣
金泥玉簡終莫能詰 載登載瞻身若羽化骨異玄
丘思旋其駕迴觀其巔誠小天下

巍巍六章二章四句四章六句

壬戌之秋 游西山也適符蘇公游赤壁之期
壬戌之秋七月既望薄言西山于邁以往我懷蘇公
寔可景仰歲月日時適值其當有酒有肴以詠以唱
載遨載嬉幽情思暢卧聽泉流枕看月上四山寥寥
形骸放浪赤壁之游曷足多讓今之視昔不無慨悵

壬戌二章章二十句

神禹篇 頌大中丞南充王師督漕也

神禹治水天地平成觀河思績功莫與爭維我王公

邦國之楨漕河之命厥任匪輕決之排之以經以營
疏之鑿之由地中行國脉以宣國計其盈惟我中丞
赫赫厥聲粒我蒸民民咸用情惟予小子頌德維誠

神禹一章章二十句

晨風篇 送虞部楊汝大奉 詔南征也

晨風飄飄王事于適子之往矣我心惓矣 將子何
徂王事敦我中心搖搖孰念其瘳 莫非王事毋為
怵怵既曰仕矣遑恤其勞 子謂何求王事靡執余
諒子心子亦何憂

晨風四章章四句

肅肅篇 送侍御吳明卿印馬于齊魯地也

肅肅王命吉日于征左右陳行我馬其騁 有馬駟

駟在齊之垆維駢維黃有驪有青 有馬駟駟在魯
之林如騅如雲躑躑駸駸 有駢其駟夙夜在公我
職斯稱我馬既同 駢彼乘駟夙夜于外式遄其歸
載其載會

肅肅五章章四句

樂府

賡有明鏡歌鼓吹曲六篇

鏡歌作于黃帝岐伯以揚德建威風敵勸士
也漢魏吳晉諸臣代有作者而唐柳宗元準
漢曲篇數用魏晉義為唐鏡歌十二篇一皆
揄揚其祖宗之功能亦雅頌之流亞也至于
我

朝陶學士安作 大明鏡歌三闕嘉靖初袁督
學表亦做爲 皇明鏡歌十三篇皆以稱頌
高皇放勲宏德之盛箴以加矣愚生也賤敢效
唐臣合紀 高祖太宗之美而賡歌之援舊
題以成新曲共成六章擬之雅頌非曰能之
而施之後日歌以爲容不亦幸歟

聖人出

漢古辭也我 高皇帝起自臨濠而奄有天
下誠不世出之聖堇用其題以賡歌之

聖人出六龍飛天眷德起濠西撥亂反正天與人歸
掃胡元正綱維都建業式九圍復自古帝王之區奠
萬古帝王之基

定武功

魏繆襲國初破鄴而作謂武功之定始于此
也 高皇渡江取太平諸路武功亦定于是
定武功始渡江江水茫茫鼓聲鋒鋒下采石平淮揚
東收吳越西定湖湘中原河洛恢其疆秦晉燕趙咸
歸降鎮南粵來越裳武功定兮殺伐張廣輪撫兮歌
元良

伐烏林

吳韋昭頌魏武克敵也我 皇祖驅殘胡而
元君自烏林奔于漠北亦用舊題而歌焉

我師驅殘胡直抵漠北境王旅奮義威宵奔絕形影
太白冥天狼淨鼠勦無復存狐窟竟全屏全師奏凱

旋踴躍踰燕領萬載華夷分中土永寧靖

宣輔政

晉傳玄以其主網羅文武之才定二儀之序也高皇之命將出師盡得死力其一時人才如徐常輩豈晉魏諸臣所能及其萬一哉輔政資多賢俊又在官使我皇善任才文武咸願仕多士起濠城四方亦戾止功成歌皇風萬國皆遵軌自古得士心誰復能如此

應帝期

繆襲言文帝以聖德受命應運期也成祖文皇帝順天撫運而繼志述事之大殆有光于先烈者歟

於昭文皇光承洪緒密運神機奠鼎燕冀天縱文武一怒安民兩京並峙內撫輿囂外扼關塞以握要幾以據全勢

攄武師

韋昭言大烈之震天下也我文皇之天縱神威廓清華夏武師之震不有甚于吳哉

擄武師威加四海奮雄噐大畏小懷民廼蘇廓清中土功不可踰風聲不冒如唐虞季犁已討古刺羣趨明明天子頌往古疇與俱

燕歌行

燕山九月肅寒威處處邊陲思授衣解愁聽砧杵守空幃鬱陶思君君不歸解賤妾淚下如珠璣君知不

知何睽違解衷腸摧傷撫琴徽歌聲何短吟何微解
推窻月隨留餘輝簷前星宿寒芒稀解手擲金錢暗
自祈歸無定期情無依解朱門炙手瑣重闈滹沱凍
合雪霏霏鴈無書寄空南飛解

豫章行

人生自有命今日何可移富貴不足慕貧賤安能辭
商宗無夢寐版築疇能知西伯不出獵羊裘終釣垂
自古賢哲人所遇皆如斯若不委窮達貿貿將安之
短歌行
有酒盈觴有歌盈章人壽幾何靡皆延長再觴再詠
其樂未央樂不及時空用悲傷况也分定妄求奚遑
聽我短歌短歌忽忘

長歌行

百川每東注奔晷時西馳人生草頭露壽命安可期
晬綺不復在喬松何所之古來誰滿百此理不待推
延年果有藥焜黃胡復衰矧茲功名薄竹帛無由垂
及時不爲樂老大悲何爲我今歌長歌長歌以自怡

鰕鮒篇

神龍忽下謫混同鰕鮒泥黃鵠志千里不及鷦鷯栖
周公居攝後三叔流言憐尼父道莫宗楚狂歌鳳兮
毀譽何足憑謗議空相擠莊周齊物化萬物安能齊

從軍行

遼陽烽燒飛狼烟牧馬胡兒荒草邊請聽從軍五更
轉城烏起堞天蒼然

羽林行

朔風吹太行白日沙飛黃溪谷少行蹟胡馬嘶欲僵
行見交河下羽林兒獨強臂鷹挾七首金勒紫絲韁

公子行

寶馬珊瑚鞭爭看美少年蹀躞長安道買醉青樓邊
盈盈樓上女邀語杏花前歡歌猶未已竟日那知旋

女耕田行

布谷聲催笋解籜誰家女子事東作自言母老兄出
門出門從軍未及婚有妹同胞已先嫁獨自服田力
耕稼以刀斫地可代牛疏犁畦隴開澮溝時雨不來
禾盡稿修園築塲愁有秋南隣北舍莫相咲有淚空
流向誰告

白苧歌二首

中庭良夜張華筵美人如花嬌且妍趙瑟秦箏調蜀
絃回眸轉袖銀燭前爲君起唱白苧篇金壺半瀉漏
濺濺今君安坐聽我鼓願爲雙燕簾前舞

新裁羅袖長且輕明妝皦皦纖塵生舞向君前進玉
嬰流目暗盼嬌盈盈百年如戲莫蹉跎請君試看東
流波東流不回西日逝我今不樂將如何

鞠歌行

雲出岫龍起馱乘風升雲騰碧空歌鐘歇曷自工還
思相和旋爲宮薄責人厚責躬人莫已知吾道窮嗟
楊雄賦河東猶待吹噓送上穹子期沒伯牙終千載
無門繼古風

出門行

河流滾滾逝不轉年光迅速一如卷美人遙隔天之
涯欲涉難將水清淺少年何事輕出門別離易兮車
無輪我身似轍遺漸遠佇立望之多荆榛君今得意
誰復顧棄我何異車後塵

長安狹斜行

長安狹斜路方軌殊難容彼美兩少年行行適相逢
相逢問君家君家盛華宗品服盡朱紫鼎食多黃封
錫爵列羣侯出入躋九重我本倦游子莫敢當其鋒
歸守畝畝間食不繼朝饗規行仍矩步險僻安能從

江南春追和倪元鎮韻

輕雷一夜抽新筍寶島香消山館靜行厨竹裏起茶

烟禪榻風微撩髮影杏花開殘春尚冷轆轤聲斷花
間井水清照我頭上巾酒染青衫巾染塵春來遲春
去急殘紅數點蒼苔濕韶華去去追何及王孫不歸
草空碧傷春轉覺情於邑誰家紅袖高樓立陌頭柳
花飛作萍鳴鳩乳燕方營營

魚父詞四首

年來生計住吳淞舴艋斜穿錦浪中溪柳綠野桃紅
煮魚沽酒醉東風

輕雷送雨過橫塘菱葉荷花掠岸香新水漲晚風涼
卧吹蘆管和滄浪

輕舟短棹自夷猶開遍芙蓉古渡頭紅蓼渚白蘋洲
鯉魚風動是深秋

江天冬日淡無暉江上漁人夜未歸風急急雪霏霏
綠簑青笠棹如飛

文錄事詩

文錄事詩

上林錄事文 肇祉 基聖

五言古詩

宿山中

出城入山寺黃葉滿林臯焚香坐高榻靜聽松聲號
自憐失路人暫從物外逃借此雲堂宿新寒欺布袍
歛然作奇夢弄棹飛洪濤憑虛不知止萬里恣游遨
去去登海嶠天風吹鬚毛驚覺滿齋白開窻山月高
送幻上人還月輪寺

南朝四百寺月輪古祇林幻公一出山薜羅三改陰
爾以月爲性我將雲作心浮雲與明月相送歸遙岑
贈王郎

王郎豪俠士意氣凌秋旻胸中富甲兵思爲報主身
少小耻間里撫劍開青鱗不隨俗士偶寧交屠狗人
大咲出門去奮身離風塵夜宿孤山月朝臨白馬津
雲中多猛將瞑目從征輪一朝功成後黃閣圖麒麟

寄友人

相別一何久再見何獨難忽忽歲復歲夢行山外山
高山與流水鳴琴爲誰彈望望不可卽書寄惟加餐

嘲桃李花

茂苑三春時桃李花盈枝爭妍共含咲自謂東君私
一朝顏色改片片隨風吹詎知喬松幹常挺歲寒姿
松恣本孤直不同桃李萎

登金陵謝公墩宿寺中追和李白韻

登高恣遠眺一望長江奔人世有代謝江流無朝昏
緬懷謝公跡今已成郊原白雲隨日散明月浪中翻
行行入古寺中壘石爲門石門時靜掩萬竹寒雲屯
回視四山寂幽賞誰與論謝公不可起誰復爲招魂
興亡餘六代斯人安獨存風流日已遠秋草埋荒墩
游人自來往不聞車馬喧我來覽古勝懷古不成言
借栖巖下石枕石移雲根夢破起默坐便覺丹府暎
幽情頗暢叙無勞絲竹繁有酒且斟酌摘蔬開寺園
人生如過鳥何用尋仙源

歸山寄金臺知己

北走仍南圖所交非俗儒黃金不足重意氣凌天衢
瞑目視王公不敢私微軀謂身可立致方希佐黃虞

蹉跎不得遇五噫出京都歸來無產業東作誰相呼
彈鋏徒激烈出門空踟躕賓客不在眼吾亦自忘吾
忍饑時誦經真不如屠酤魚目亦相咲空與明月俱
他年倘相訪知我學潛夫

擬古五首

翩翩林間鳥悠悠嶺上雲雲出本無心鳥飛時念羣
物亦欣有託矧余處世紛中腸慕遐舉濩落無所聞
歲月去云疾荃蕙寧久芬古道已寂莫吾衰亦何云

其二

人生駒過隙一朝難再晨有酒且斟酌行樂湏及辰
胡爲自結束不用常悲辛四海盡兄弟何獨骨肉親
苟誰往化滅同作陌上塵願言棣華接勿與衰草均

其三

庭前雙桐樹四月始見華盛夏敷繁陰亭亭疊清霞
禽鳥知所止吾亦愛清嘉大火忽西流敗葉隨風斜
空抱大雅材委棄若泥沙何用覓知音相與訪伯牙
伯牙沒已久行行浩無涯

其四

女美衆所憐士窮世所賤貴賤何足言世情從此見
買臣未遇時愚婦心先離季子佩金印妻嫂迎恐遲
自古已如此何用空悲噫

其五

東方有美人遠在天之涯窈窕淑且婉意態殊閑佳
春風借色艷色艷嬌如花珊瑚初出海未足比光華

誰家白面郎金勒紫游韁欲涉不可卽立馬遙相望
何如化鷓鴣飛傍朱欄旁

山中徐步

山中初雨過一雨樹如沐幽人獨往來幽鳥呀成曲
僧來薦新茗狎客事碁局斜日閣西嶺扶杖下山麓

感遇

我昔少壯時委懷在書史被褐欣自怡策駕辭鄉里
一往三十年無成復耒耜寢迹山南村真想只如此
緬懷望前途歲月去何駛

寓言

昔爲凍餒驅投耒學干祿北寢與南圖燕趙日馳逐
縱有遐舉心不及雙黃鵠誤落在塵網歸來宿茅屋

田父相往來慰我素心曲俯視池中魚仰送飛鴻目
荏苒星氣流壺觴聊自足

卜築

結廬山南村素心可與言鑿沼駕飛虹題爲日涉園
居室八九間環周水潺湲惟與鳥雀馴不聞城市喧
去去百載外身名安用存

仲夏

夏日樹扶踈園庭敞中虛寄傲北窓下泛覽古人書
仰無慚高鳥俯不媿游魚只此有餘趣吾真愛吾廬

與友談昔

昔我年少壯志逸游四海荏苒四十秋無成徒慷慨
且復歸去來山中得君在晨夕相往還芝蕨共携采

前途知有幾無須問真宰

園林秋夜

獨坐聞秋聲秋聲來樹間燈影搖虛室悠然意自閒
閒情付流水日夜猶潺潺人生誰滿百何獨往不還
雪

飛雪滿園林號寒有負薪千樹梅花綴寒枝玉勒新
呼童貰酒至竹爐溫火親美殺袁紹公僵臥不干人
雨

仲春時雨降草木俱欣欣水長新波澗風來水弄紋
茅簷語玄鳥四山生白雲愛茲品類繁野色過橋分
唐人曹鄴因舉不得第有四怨三愁五情詩余
亦要作一怨二愁三情以望詩人救

美人顏如花顏好誰人知無媒不得嫁終亦還自疑

右一怨

春來萬卉妍枯木新條發着意待東風難消頭上雪
髮白終難變金燒亦不成人生誰滿百何以學長生

右二愁

桃李盛春風芙蓉媚秋渚開謝各有時天工豈無處
猷鶴翔天表孤鴻下沉湘何如雙飛燕營壘栖雕梁
有女適王孫或作黔婁媼美殺嫁田夫頭白常相守
右三情

園亭

園林敞南軒悠然與世隔早起看青山山青一如昔
清風從東來吹我頭上幘眷彼松菊存品彙隨動植

隣叟有好懷往來數晨夕

雨過觀魚

天時久不雨池沼水皆涸夜來新雨過水漫復如昨
游魚隊隊行悠然自泳躍莫道我非魚我自知魚樂
五言排律

鄔都尉招飲

主家開綺席晴日敞華堂賜第連霄漢朱樓傍苑墻
飛花沾燕壘垂柳轉鶯簧錦瑟當筵立銀箏列雁行
舞娥歌翠袖侍女伴宮妝法酒傳中使珍盤出上方
畫屏圍玉笋澗水滌瑤觴詞客調鸚鵡彤庭儀鳳皇
紅蓮分太液篋竹奏琳琅鶴馭羣仙駕鑪薰內賜香
月高人未散斗轉露華涼

虎丘劍池祓禊

風光今日好閒步劍池邊修禊千年事暮春三月天
空中樓閣迴池上輓轡縣少長忽咸集嘯歌時劃然
流觴環列坐煮茗汲三泉放浪形骸外登臨杖屨前
巖花晴拂檻澗草暮含烟携榼追歡賞沿流急管絃
蘭亭蕪勝迹一記至今傳

海上觀潮

八月近中秋閒來海上游凝眸瞻貝闕俯檻聽龍湫
踴躍乾坤浴空濛天地浮潮聲奔萬馬水氣動潛蚪
怒浪翻鮫室驚濤擁蜃樓此身空浪跡處世一浮漚
慷慨心猶壯年光日夜流

七言古詩

桃花磯逢丈者

虞山山高高入雲下有古磯烟氤氳萬樹桃花夾流水水邊雞犬聲相聞雞犬相聞茅屋底屋底老人坐不語豈是當時遺世民避秦霍政來居此笑而不荅意自欣觀之古貌亦古心我欲跪之問寶訣回頭不見深山深

石湖行春橋步月

晚來雨過煙藏寺日閣沉沉萬山紫湏臾湖光潏灩迴曬龍弄珠出海底海底一躍千仞高星光閃燁浮金鰲朱欄倚遍市喧息酣歌倒坐醉中豪當年此月今不改曾照吳王舊臺榭吳王臺榭蹟已陳惟有此月今猶在古人今月已千秋今月古人今在否眼前

烟月不堪數何如范蠡西施游

寄羅達夫石蓮洞歌

文山蒼蒼文水碧中亘綿延連一脈石門闕道虛翠屏天削芙蓉秀絕壁絕壁危崖五色溶仰看菡萏排穹窿丹牀石竈隨所設奇花異卉青瀟濛天降羅公美顏色卽今海內文章伯詞源倒瀉三峽流珊瑚出海秋月白奪標曾擅少年塲甲榜名題金字黃明堂法座列鏞磬石渠中秘聲琳瑯建儲一疏上天子萬言切直因忤旨歸來重向洞中游長齋乞鉢常如此洞門倒掛蓮花巾手揮玉塵辭將迎名山或有異人遇跪受寶訣祈長生

承惠石蓮洞歌調逸意古復出塵外誦之再四雋

永令人不能去手會當索善鑄爲入石壁間當與
此洞同流宇宙也倉卒未卽廢和誠負高情滯迹
病踪歲增一歲不足道燈前夜色倍有懷人

世講弟羅洪先頓首

元夕篇

長安今夕是元夕皇都佳麗無殊昔昔時曾到蓬萊
宮龍膏鳳炬光千尺千尺光凝結絲樓鰲山重疊雲
烟收烟收明月正當頭仙禦燃燈復道周遙瞻天
子六龍馭五色雲車擁高處高處離宮別館開翠蓋
鸞輿繡幃御出向天街紫陌長王侯第宅闢新妝新
妝初罷踏明月蕙火蘭烟滿路旁路旁許史金張宅
銀燭高烧邀上客上客調成鸚鵡篇鳴金伐鼓開華

席歡歌未已夜將闌星斗橫斜禁漏殘傳呼行辟候
朝者聯鑣玉珮聲珊珊

避暑

避暑來遊到虎丘虎丘南去林堂幽林堂幽靜無人
至修竹千竿碧欲流竹樹扶疎覆亭館浮瓜沉李調
冰椀一觴一詠暢幽情不用銀箏并翠管翠管銀箏
醉昔時昔曾沉醉習家池何如跣足科頭坐世事紛
紜捻不知

打魚

山田犖角麥秋寒山雨欲來風激湍觀魚踞坐得真
樂閉門新竹千琅玕千竿竹映蒲柳綠陰符在匣羞
更讀惠連池上冒雨來携幼呼朋慰羈馱獨有元龍

興自豪命童打魚魚尾勞大魚拙強小魚棄饗子揮
刀飛雪高欣然一飽意自足不羨鏡湖分一曲六畝
魚租五畝竹曾看陶朱治生錄不啻利倍有十千但
願怡怡天樂全君不見田家以感荆再合姜氏共被
今猶傳况吾與爾樂便便十日一游期莫愆

右子悱弟約余旬日一游山園偶愆期不來詩
用招之卽冒雨而至遂命童子打魚供餉既醉
而還賦以長句兼示後期

彈琴

岡上梧桐高十尋梧桐翠葉敷清陰主人獨自撫琴
坐獨坐閒調太古音太古遺音久不作此道只今空
寂寞鐘期已矣伯牙亡千載知音已寥廓悠然流水

與高山山矗矗兮水潺潺方壺員嶠在眼底一笑推
琴心自閒

夜臥墓所不寐

孤燈明滅茅簷深布衾單薄寒相侵月高山寺聞鐘
聲耿耿不寐生憂心心摧腸斷身無倚春宵獨臥荒
村裏少年一刻千黃金此時一刻愁萬縷愁思萬縷
夢親幃驚覺惟聞烏夜啼起來試取春衫着猶道當
年戲綵衣

贈沈道人

沈休別我非一日歸自南屏峴山隔峴山岩堯雪水
西碧浪湖連芳草色今來訪我白雲深雲深塔影空
沉沉銅盤戲曲梅花衲駐顏不用燒黃金修髯玉立

絕塵鞅竹籜爲冠鳩作杖恍如洪景出山圖獨行徐
步紅橋上紅橋東來虎阜居分明諸葛南陽廬與君
朝夕數來往還讀人間未讀書

錢學博青之七十

與君同學二十秋復同追隨京國游兩都共賦獻宸
旒當時人擬稱元劉天閑寥曠俱未收阜比君擁登
萊州掖道宮墻環講求洧川再轉仍淹留何當伊洛
多名流種成桃李滿谿頭忽憶吳山思乞休拂袖歸
來志已爾孫曾繞膝鸞鳳儔玳瑁作賦輝皇猷我今
花甲亦已周費盡黃金一敝裘何時解脫釣鰲鉤歸
與君盟沙上鷗

上元日兒輩集諸友會文至晚張燈小酌

去歲有兒同客處一燈相向愁依倚我今歸來忽踰
年兒獨淹留在京邸歸來兒輩仍紛紛大兒小兒皆
屬文盍簪會友集同志竒文賞析俱殷勤須臾雪霰
滿庭宇飛花如掌隨風舞燃燭高張四壁燈坐中上
客調鸚鵡吾家老叔八十強牀頭酒熟呼我嘗東鄰
兄弟衣金紫尚憂不足心遑遑今日諸君各矢志致
身早早少年事流行坎止順吾常鼎鼎百年真是戲
贈楞伽南上人七十

當年曾臥楞伽寺日有敲門問竒字窓明几淨獨焚
香燕雀猶懷鴻鵠志南郊上人方少年誦經趺坐佛
堂前閉關日夕修禪觀金磬時聞落遠天汲泉煮茗
隨吾適時采於山美可茹上人真是遠公流媿我元

非蘇晉侶誤落塵網三十年歸來重到湖山邊來叅
雪竇一龕裏袈裟雲臥如金仙香燈歲晚無異昔小
闕浮提已七十願結蓮社山之中自笑聲名何用足

九日登吳山

吳山山高高入空懸崖削壁青芙蓉登高今日逢重
九結伴同遊山上峯峯前山下人如蟻走馬乘輿並
肩倚日暮行人尚未稀畫船簫鼓中流起簫鼓聲悠
湖上游湖光山色恣宜秋行歌雜沓遊人散明月滿
山烟霧收

閒居自述

十年上書不得意歸來高臥深山裏山深被褐掩柴
扉環堵蕭閒少知己知己無人斷往來兀然獨坐茅

簷底茅簷兀坐不記年無復馳心慕青紫一朝忽枉
故人書問我何爲不入仕幡然一出向長安萬言不
敢干天子天子詔許爲園官低頭授職聊居此此
身踈嬾不受拘白首爲郎還自耻飄飄掛冠神武門
神武門前乞恩旨蒙恩早賜拂衣歸拂衣依舊還桑
梓桑梓山林日月長日上山窓呼不起羅列孫曾繞
膝前膝前歡舞歌樂只

七言排律

石湖遊泛

春來今日到湖濱湖邊村市人紛紜波光遠映蘼蕪
沒山色晴開錦繡文茶磨山頭茶正熟盟鷗亭外鷗
成羣青帘隱樹酒家近翠帶牽風水荇芬錦瑟瑤箏

湖上起朱簾畫舫鏡中分醉如白傅圍紅袖嬾學羊
欣寫練裘谿谿畔漁舟垂晚釣寺中樓閣帶斜曛舉頭
月色當空照何處鐘聲滿座聞千古興亡已陳迹吳
宮越壘空氤氳

北京西山借榻碧雲寺

入山蘿薜晝沉沉下馬行過古洞陰獨倚石橋看急
澗坐觀庭宇俯喬林環墻山色浮烟靄繞砌泉聲和
磬音虛榻借栖清夢醒閒窓臥抱白雲深梵鐘催落
窓前月老衲時彈膝上琴斐几香殘閒睡鼻佛堂齋
供有來禽蘋婆梅花滿地飛紅雪策竹千竿倚翠岑
何日拂衣重過此常依清境洗塵心

文錄事詩

明文錄事詩

上林錄事文 肇祉 基聖

五言律詩

侍大父過王二丈履吉越溪庄

隨翁訪叔度放棹越溪深竹徑數椽屋桑園十畝陰
汲泉頻洗硯促膝坐鳴琴高士平生慕今朝慰夙心
汪子木園與薛用傳施安卿明卿陳子白文會
名園啓文會繞屋樹交加捲幔窺新燕臨池看落花
樂耽長統志書效子雲家竹裏輕煙出軒前試煮茶
野望因過楞伽侃公精舍

野曠山藏寺祇林一望中諸天懸采翠殘照遲晴空
松下疏精室簷前聽晚鐘欲耽清淨賞隨喜訪支公

石湖

湖光披白練日夜泛青簾
帆影鏡中落鷗羣沙上眠
楞伽山裏寺茶磨晚含煙
羨殺鴟夷子飄飄去不還
蔭白堂卽事

結屋近清嘉虛堂背郭斜
門閒人問字簾捲鳥啼花
盛世容踈嬾端居戀物華
齋頭書滿架不羨子雲家
早起

曉起露光沃熙微景物鮮
窻間蠅擊紙庭際草含煙
短髮頻看鏡殘星猶在天
虛齋絕塵想坐久意澄然
月夜與王明度明善登文筆峯

晚來秋雨霽山月向人高
同上留雲閣因攀栖鶴巢
詩聯林外句幘岸醉中豪
獨立羣峯下天風吹鬣毛

讀書楞伽寺松風閣

重來湖上寺借榻上人居
月色侵虛閣松聲和讀書
攬衣驚鼠下開卷試燈初
萬籟一時寂鐘推更漏餘
雨夜與吳元定朱日宣范子潤王玄靜袁振伯
集石湖草堂

晚步山中寺堂開萬竹林
清宵一把盞細雨共論心
秉燭成懽會高歌傳谷音
佛前禪誦息遙聽磬聲沉
天平山謁范魏公祠

入山人境隔古寺白雲留
萬笏齊青漢斜陽下石丘
義田存後裔勲業尉先憂
尚有泉清冽綫綫一脉流
餞馮信伯杜與言會試

小集樓居好開窻新捲簾
名推馮奉世聲重杜樊川

二妙忽同至一杯行色前行行曲江上更喜得春先
過陳丈白陽田舍留集浩歌亭

種竹開三徑編籬翠作屏憐公千載調憶別兩秋螢
杯盞香醪白盤飡菜甲青因過問奇字醉卧子雲亭
外舅召復翰林兼司經局校書

當代青宮輔如翁獨異才校書供閣直補袞代天裁
名譽留東觀文章落上台輞川空別業未許賦歸來
寺游同王玄靜正上人

野寺羣峯裏藍輿一逕通窻開飛瀑外殿落翠微中
饋饌延過客繙經叩遠公慚非蘇晉侶玄覽得相從
黃約之慎之招飲書齋

江夏聲華舊君家譽望宏獨憐千古調喜得二難并

方館開嘉讌庭梅吐玉英寒宵湏秉燭月上巳深更

虎丘

出城將數里塵土離人寰遠見林端塔來登寺裏山
雲飛千頃碧石點一臺斑簫鼓中流起白公堤上還
楞伽寺湖山樓同朱日宣王履均王玄靜侃朗
二上人晚眺

湖上知名寺樓臺倚碧岑法堂虛枕簟狂客散冠簪
塵劫空中滅鐘聲靜裏沉方知禪可托共禮白雲深
秋夜王吏部錄之丈招飲

吏部聲名久堂虛客到稀舉杯留夜酌邀月弄清輝
露沃天香襲談霏玉塵揮清朝思報荅

明主正垂衣

金陵舟中約陸子行韓承孚從陸入京

雷聲喧夜泊早已過毘陵驛樹隨溪度蓬窻帶雨凭
語音時漸別壯志欲騫騰明日丹陽郭肩輿擬並乘

丹陽

早發丹陽道行行路轉賒聽雞過野市並馬踏槐花
酒肆青帘接茆茨綠水斜征途知不遠明日到京華

高橋門

秋風吹鴈影佩劍斗光寒輦路飛塵遠橋門勒馬看
青宵雙鳳闕黃屋五雲端題柱平生志何時上禁鑾

姚元白市隱園借榻

禁城藏別業披莽似郊垆沼引秦淮碧山排鐘阜青
竹光分曲逕秋影瞰虛亭下榻市喧息林扉盡日扃

雨花臺

金陵山水勝佳麗是城南法雨飛空磴天花散碧潭
明光曾杖錫太白有吟菴行到煎茶處泠泠玉一涵

徐魏國園亭

麟閣勲庸冠金貂寵後昆水漿浮碧碗槐柳蔭重門
池泛青簾舫堂開白玉樽笙歌時不徹月上已黃昏

葉曾生書齋

結屋近山塘柴扉護短墻野花開竹徑湖石磊山房
室淨生虛白窻明搨硬黃晚來人散後獨自引壺觴
九日不出

一秋慚失意九日廢登臺菊爲佳辰發懷從濁酒開
哀蟬猶夕響征鴈向南回時序愁中改城高砧杵催

君山與黃吉遠望

石徑攀蘿上風松山半亭天浮江共遠沙積水俱停
海蜃吞銀闕秋煙虛翠屏春申遺像在吾亦薦溪萍
大父玉蘭堂小酌時將奉侍家君應試南畿
吾祖已垂白堂開聚德星衣裳動雲氣杯酌吐玄音
喜共趨庭日那堪駕遠臨歐公倘相遇蘇氏惻初心
侍家君同黃子旋杜與言過龍門得二鯉家君
賦詩因命作

鼓枻龍門上驚看雙鯉跳錦鱗初出水鰭鬣欲騰霄
霜刃霏花白松枝帶葉燒欣然一餐飽把盞自通宵

焦山

山寺猶存姓門寒古樹停丹臺雲氣紫蓮閣寶光青

未辨華陽逸空餘瘞鶴銘登臨吾已倦暫憩海雲亭
登金山

波心千古寺日夜一峯浮草色分江岸潮聲帶海流
月高人返棹更靜水鳴樓欲坐金鼇閣攀躋最上頭
出場月色如晝侍家君至顧尚書園登見遠樓
長安秋過半乘月上危樓星斗中天燦乾坤萬里周
漏傳金闕迥桂瀉玉杯浮坐久忘言處臨風起暮愁
江上懷張幼于

獨卧吳淞上令人憶季鷹詩篇憐敏捷志氣羨飄凌
天末雲千疊江頭月半棱軍麾今滿眼音問阻親朋
太湖

太湖八百里七十二峯縣震澤禹功遠洞庭仙蹟傳

波翻沙際鳥石繡鏡中蓮煙水秋來濶平吞萬里天

黃子旋宅會文

清嘉風土淨華館晝沉沉選日開文讌良辰會盍簪
追隨期辨志相與共論心亭際無塵雜松聲奏雅音
春晝

午睡酣初醒日斜花影移夢回烹紫笋几淨寫烏絲
乳燕窺新竹文魚漾淺漪問奇人去後一任掩茆茨
杜與言登衡嶽回鴈峯有佳什見寄

回鴈峯頭坐新篇寄舊知憐君遙念想動我故鄉思
南嶽開雲處高樓待月時此時一壺酒誰與共傳卮
過孔加丈蕉露館

高人多道氣曉啓碧窻寒摘葉供書寫研硃點易看

霏談揮麈尾遠興薄雲端相對渾無語須教杯盞寬

陸壽如陳懋吉過射涇田舍

秋暮初收穫香醪已自開江頭新雨過溪上故人來
簡畧忘幽僻輝光動草萊論文真有愧竹徑日徘徊

牛首山

下馬獻花處千巖秀色連乘風吹晚步披莽上山巔
神宇江流遶禪房塔影縣夜深催擊鉢詩就不成眠
靈谷寺

山寺度門遠松寒十里陰鐘樓苔蘚合閣道雨花沉
泉咽山中路人傳空外音歸途未忍去猶自戀祇林

秋宵月下懷張叔貽

獨坐空庭下涼風入袂吹起看新月上忽動故人思

驚鵲栖還定高梧影漸移壯圖愁未立青髻已絲絲
休休菴

高士蒙山老市廛精舍開何如岳壑趣俱入戶庭來
法雨飛禪逕天花下講臺雲書遺一匣玄悟少人推
覽鏡

覽鏡對愁顏西風秋雨零慚看新白髮猶着舊青衫
酒醒難成寐詩裁不用芟辭巢雙燕子空自語喃喃
過呂梁王水部茂行邀飲

境入呂梁勝水縣洪上頭狂瀾思一障巨石伏中流
樹接江淮遠雲連齊魯浮才名王水部携酒上蘭舟
題百穀半偈菴

高人愛精潔築室學逃禪半偈題菴額長齋坐佛前
架頭齊古帖簷下起茶煙筆硯閒緣在時還對簡篇
大父書至云周孫得子於我爲玄孫此是家門
之慶也賦詩志喜

昨夜燈花吐書來喜得孫高玄看五世閭里賀盈門
繩武培前業貽謀有後昆吾翁當此際燕賞倒金尊
讀書呂公祠

滿眼江南景芳祠綠樹遮苔花侵畫壁旭日射簷牙
四座虛堂敞一灣流水斜晚來橋上望明月照蒹葭
舟泊潞河遇雨

無媒辭魏闕潞水帶歸舟一夜溪頭雨千林樹作秋
鄉心頻入夢蓬底轉生愁不爲琵琶泣青衫淚自流
見新月

去國未千里俄驚近德州仲秋纔二日新月已垂鈎
影逐斜陽下光隨過雨收一年前此際結伴五陵游
夢長安

旅食京華久風塵興已闌出城逾半月猶夢在長安
未遂金門隱空思玉宇寒不知行路裏還作未歸看
山齋雨過新涼襲人夢中有作起而足成之

一雨祛煩暑虛齋竟日涼簷前殘溜滴庭際晚花香
簾捲風吹鬢雲開月在牀睡來多爽氣夜短夢偏長

春盡

春盡園林寂風來水弄漪自開南畝際誰寄草堂貲
室靜生虛白門間有問奇吾能委窮達聊以憫遐思
塔影園次皇甫司勳

鑿池來塔影結屋倚山阿疑是浮員嶠翻同瀉翠娥
昔聞挂青漢今倒暎渟波惠我驚人句賡酬柰拙何

附司勳詩

因山開別業幻跡在南阿暎水疑浮鷺臨姪似影娥
綦詩咏青漢竺偈頌澄波牛首君登未窻間校若何
嶺南黎維敬寄書至

不才人共棄高誼爾偏求一自吳門別三經炎海秋
拂衣還挹袖躡涉水訪浮丘兩地懷思切何時得卧
游

晉江蔡少叅別有十三載月夜過訪又別

久與蔡經別俄驚訪釣磯乘風來九曲帶月扣孤扉
握手談疇昔登山思逸飛飄然解維去佇望獨依依

早朝後遇雨

初旭射金扉朝霞護紫微輕煙迴御輦細雨濕朝衣
仗逐蛟龍轉班隨鴛鴦歸天家膏澤遍苑樹綠陰肥
署中官舍書懷

出城七十里一望路迂賒雞犬村邊塢桑麻樹裏家
民居環署治風土亦清嘉官舍無塵雜高槐映碧紗

秋日早朝

雙闕千官集平明曙色微聽殘清禁漏初啓掖垣扉
劍佩聲成韻旌旗露下晞自慚通籍晚敢謂素心違
乞休

腐儒通籍晚潦倒媿生平官署依村市朝參入帝城
奔馳頭盡白辛苦事無成今日乞閒去歸舟日夜行

清江浦追憶沈虞部

一入新庄閘令人無限思窮愁文與可空憶沈佺期
掛劍慚無處遺金感昔時心香聊一炷飛淚薦江籬

秋暮

夕陽閣西嶺秋色亂川中衰草猶餘綠殘荷撼碎紅
浮生元自寄歸老慊余衷忽聽漁舟笛溪頭弄晚風

山居追和羅太史

卜居依虎阜茂苑卧文園心會禽魚樂門無車馬喧
塵中三十載歸悟五千言杜甫愁行役常思晚計存

附羅太史詩

平居無雜慮所志在丘園種竹非醫俗耕山得避喧
年多知物候春近卜禽言豈不營朝市謀生各有存

和袁魚叔喜雨用韻

今歲旱何久令人生隱憂通宵雷雨作殘困鬱蒸收
倚檻花枝重迎風燕羽柔山齋聚良友五月類清秋

張伯起同王玄靜吳恭先携榼過塔影園

林卧春方盡簷前鳥鵲喧羣公將小艇携榼過丘園
握手談陳迹澄懷悟道言溪頭相別去歸獨倚南軒

伯起有詩次韻

林花落未掃好鳥尚求聲忽枉故人駕依然舊日情
題詩叙離隔促席話平生何日重過此相期待月明
雪中閉戶不出

去歲冬無雪今冬雪早飛因風飄上箔帶雨潤露衣
入夜寒仍重推窻晚更輝村中僵卧者竟日揜柴扉

到園

歸來三閱月今日到園亭剪伐亂荆棘重修新竹屏
鄰墻過濁酒晴鵲噪閒庭依舊草堂在北山空勒銘

雨過入山莊

一雨連三月園林久不來盈池環綠水繞徑長蒼苔
鸚鵡褰簾語薔薇滿架開心閒無一事重葺舊亭臺

避暑山莊

城中如在甌避暑到林堂近水樓臺迥開窻枕簟涼
啣杯同阮籍高卧傲羲皇箕踞科頭坐山深白晝長

久雨

夏秋連月雨日日掩柴荆簷溜窻前滴班鳩竹裏鳴
香焚凝淨几茶焙煮砂鐺何日開樽酌中庭待月明

新晴卽事

久雨不出戶秋來日日陰今朝將野艇出郭過園林
水漲橋梁沒堂開竹徑深閒居無雜慮消盡市朝心
雨霽

三月雨不歇苔花滿徑生經時不出戶今日喜新晴
庭際無塵雜簷前有鵲聲何時將小艇坐看晚霞明

九月

九月已將盡園林景物嘉草堂三歲別修竹萬千斜
野鳥間關語芙蓉爛熳花閒居無客至汲井自烹茶
釣魚撈蝦以供午餐

疏磴洗塵沙澄然水一窪呼童拋釣餌着屐自撈蝦
煮飯春香稻烹茶汲井花欣然無一事憑几讀南華

山莊

倚杖入山去山園村逕通嵐容開晚霽塔影卧池中
籬落野花碧枝頭霜柿紅小庭看月上鄰笛起墻東
出郭

一雨連三月今朝天喜晴閒移書畫舫出繞闔閭城
晴色開山霽溪流與岸平民廬俱沒盡觸目摠傷情
人日

開歲已七日清晨煖氣回郊園亭樹迥人日草堂開
寒勒梅枝瘦雪殘新水來有懷吟不就取次試新裁
春日書懷

春來風日好放棹到山莊雨過花枝媚泥添燕壘香
青山露墻角新水漫池塘獨坐無人至茗杯聊自嘗

初夏

初夏山莊好園林風日嘉閉門時晏起澗水試新茶
雨細魚吹浪風微燕蹴花草堂空寂寂竹樹自交加

目青

目青不出戶麥秋天氣寒鳥聽枝上語花似霧中看
累月惟高卧經旬不整冠心閒人事少容膝易爲安

五月

園林亭館靜仲夏綠陰微乍煖荷香滿新晴梅子肥
碧雲將雨過紫燕引雛飛竟日無人至呼童掩竹扉

園亭

春色已過半山園晝掩門池平榆莢雨酒貫杏花村
簾捲几初淨香殘火尚溫地偏人蹟少用拙道應存

過周公瑕支硎山房

吳王賀九領西去有松關鳥語屋頭屋雲橫山上山
翻疑隔塵世別境非人間樽酒共斟酌乘輿夕照還

又

不見故人久相逢意共欣盤飧多海物棐几有鑪薰
簾色浮香帶縹波光寫練綵羅含亦有宅遙隔數重
雲

曉山

月流墮西漢巖樹散鴉羣曙色初分處樵歌已漸聞
仰看松頂路半是隴頭雲頃刻朝曦動晴開錦繡紋
經闔塘

不到闔塘久俄驚二十秋村墟猶歷歷日月去悠悠

古樹埋蒼蘚少年新白頭門前一灣水依舊向西流

吳淞之水皆西流

新曆

兩年十月朔頒曆五雲邊今日歸林下猶思拜陛前
重看新歲曆自喜樂餘年獨坐閒無事焚香結靜緣

文錄事詩

文錄事詩

上林錄事文

肇祉

基聖

七言律詩

綠苻村莊簡城中諸友

數椽茅屋倚江開門徑蕭然長綠苔出郭清閒塵事
少經旬時斷故人來滿池鷗鳥窻前浴夾岸桃花柳
外栽寄語城中舊知道小詩隨手報新裁

同杜與言瞿德徵登茅山與言病不能從而余
與德徵直躋絕頂時夜將半殿簷星月可摘歸
至山腰惟見燈火輝煌笙簫合響真仙境也捨
輿而步詩以紀之

遙望三峯橫紫煙藍輿屈曲似飛仙華陽洞口泉聲

合貞白祠前草色連子夜朝元星可摘半空聞樂月
低懸尋真不覺歸途遠一帶松濤欲曉天

與葉曾生黃子旋陸壽如金時章陳林吉杜與
言趙凝甫會文于馮信伯樓居

郭外山塘近市廛層樓高棟接雲天飛花點點時沾
硯鳴鳥嚶嚶窺捲簾欣賞奇文頻檢閱剖分疑義試
窮研明時會聚同心友賦就河東獻陛前

秦淮夜泛

秦淮灑灑雨初收結伴沿流夜放舟月轉柳梢人候
渡雲移沙渚樹回洲簫聲近水龍吟細河影橫杯琥
珀浮醉去側身天地小卧聽潮向夢中流

喜倭寇平携妻孥躬耕射涇田舍

海上三年寇橫行好音慰我已收兵卽携妻子還田
舍重載琴書出郡城 聖世喜聞歌夏武材官今見
荅昇平但求處處銷金甲帶雨牽犁日課耕

項子長邀集煙雨樓

重來樵李暮春時煙雨樓開近水湄飛燕浴鳧沙漠
漠新蒲細柳碧差差吾生事業慚文可君等聲名似
項斯倚檻臨流無一事停杯分韻賦新詩

崑山傅氏園

偶過名園風日嘉編籬護室樹交花開窻拂几頻揮
塵汲井臨軒試煮茶萬斛天香涼雨過一枰棋局篆
煙斜主人知是商霖後肯負明時閱歲華

集顧文康公園亭

相國園亭木萬章昔年幾度醉瑤觴四圍穿沼游魚
躍數頃當門晚稻香北望青山開爽氣東臨綠野印
斜陽郎君方擬明時用付與閒雲護草堂

燕子磯

殿宇參差倚翠厓碧桃開處有仙家半空濤雪當軒
舞滿目春帆帶雨斜江草含煙連斷岸柳風吹絮颭
平沙何時借榻虛亭裏早服簷前一片霞

觀音閣

曲磴層巖擁殿臺朱宮斜瞰大江開桃花翻浪江豚
上石壁停雲山雨來時倚曲欄瞻貝闕醉眠芳草夢
蓬萊浪游十載經過地此日登臨獨暢懷

衡翁示肇孫北游太學

阿翁九十苦鍾情倚杖那堪送汝行壁水去游
天子學春風須聽上林鶯壯途初發千山仞雅志無
忘萬里程三百年來忠孝在慎言毋潰舊家聲

泊楓橋用大父韻

辭親遠別動離情滿幅風帆帶雨行水長關河無阻
道春深柳陌尚聞鶯輕拋故國三千里細數遐征第
一程此夜維舟不成寐寒山依舊起鐘聲

唐職方邀登金山命諸將官射潮

萬古江心湧殿臺高賢雅會得追陪迎潮落羽蛟龍
避簸岸飛濤天地迴報荅昇平諸將事挽回滄海使
君才歸舟日暮心偏壯極北紅雲是上台

長安市得蓮硯寄吉水羅太史石蓮洞中

舊硯渾如玉版蓮墨花狼籍紫雲鑄時凭棊几披香
潤想摘金莖滴露研題稱洞名存古制天完山骨得
長年須令洗淨京華土寄與高人日草玄

秋夜借榻胡太史楸禮嘉樹館早起有詩見贈
次韻奉荅

滿架圖書一榻空小庭花影上簾櫳眼前踈嬾無如
我海內文章誰似公一派笙歌人靜後萬家砧杵月
明中夜長酒醒難成寐睡起窻間日已紅

附胡太史詩

風歛微雲淨碧空松聲和月到房櫳却疑窺戶懷安
道絕勝登樓對庾公四海交游投轄處百年心事把
杯中良宵聚晤真難值莫訝頻挑燭影紅

立春日嚴相公招直閣中賞紅梅恭遇

上賜春盤御酒拜嘗賦詩以謝

晴日辛盤出上供青絲玉碗護黃封雪殘鳩鵲春回
早花暎蓬壺色更穠紅日近窻凝瘦影煖風吹酒暈
寒容願公厚養和羹味長伴仙桃醉九重

韋園同姚元白胡楸禮送姚太史左遷

韋園開遍滿庭花相送姚崇去路賒忍見仲舒辭闕
下愁看賈誼謫長沙左遷暫去趨紅幕內召還來侍
翠華更盡一杯燕市酒那堪回首各天涯

徐李二相公留飲直閣

直閣朱扉傍苑開幽風殿轉過南臺珍盤遠自中厨
出法酒傳宣內使來頻下南洲徐孺榻時啣北海李

膺杯同心推食欣殊遇何幸追陪近上台

游攝山栖霞寺

晚過名山蹙解鞍萬松深處俯清湍斷碑小篆題陳
額古佛千巖蝕蘚斑春茗試烹紗帽側峯名石蓮翻出
鹿泉寒白玉泉何時借我僧寮裏閒取楞伽帶月
看

龍節推寄胡太史楸禮書至

漫世虛教俗眼看敢期岳問到江干一尊常醉山花
咲萬慮都消宇宙寬忽報遠傳銀字帖翻思高處玉
堂寒故人不解余心事一紙空煩寄熱官

姚元白官舍侍家君夜集因寫小圖紀興

論交廿載鬢蒼浪握手高歌指建康豪興漫沾燕市

酒風流猶說少年場龍蛇護落嬰塵網猿鶴驚猜憶
草堂雲裏鐘聲度雙闕月明寒夜話偏長

寄謝羅太史

昔日青宮輔導臣今歸蓮洞葆玄真八行遠寄三千
里一別俄驚十四春丙午抵巴未豈有虛名流藝苑不虞
推譽動高人燈前夜色興懷處兩地相思益愴神

宿瑯琊寺追和韋蘇州韻

繫馬瑯琊古礪灣寺門深寂倚豐山試邀月向亭中
望誰似雲歸洞裏閒虹影倒垂環駟外泉聲飛出萬
松間一宵借榻逢僧話又逐征鞍度曉關

重游西山自弘濟院轉出登五花閣

薜蘿深處玉虹流錦石踈花曲磴幽禪境未追蘇晉

金華集
五
侶煙霞卽似庾公樓凭欄遠送千峯雨高閣猶疑五
月秋欲卧名山談釋部只愁九骨異玄丘

大宗伯南充王師有詩贈行次韻爲荅

西風羸馬出城東滿目離愁落照中塵世百年心獨
醒江湖數載鬢雙蓬敝裘懸結思歸切操瑟空慚有
意工負教孤恩真潦倒可能復夢大槐宮

附王公詩

剖符曾向五湖東已見爲儒多士中二十年餘重會
面三千里外又飄蓬傳家節操心逾厲奕世文章體
更工歸去好應修舊業賦成還獻大明宮

恭候

聖駕幸成均

玉輦傳宣下禁鑾轆星門啓曉鐘殘旌旗影拂蛟龍
動劍佩光凝壁水寒日上雲裘開五色仗分馳道擁
千官青衿何幸躬逢盛喜得今朝對御看

聽講

仙仗平分日月懸天香飄拂御爐煙橋門環擁千官
肅槐樹陰濃夾道連坐論尚遵周典禮授書開講禹
謨篇君臣克艱愚生欣喜遭殊遇何幸躬瞻玉陛前

立秋逢七夕和張伯起韻

久雨山齋掩薜扉雨晴新月一鉤微卧看天上雙星
度又見庭前一葉飛貧似阮咸難免俗賦如永叔和
應稀回思帝里承歡處猶着斑斕戲綵衣

宿馬林

雪積寒林深復深肩輿隨處繞車聲西風古道過羊
巷落日孤村宿馬林四壁有詩題往歲百年無計懈
初心寒雞野店聲偏早一夜無眠獨擁衾

清秋

清秋一月廢梳頭落盡槐花雨未收詩句長從無意
得功名元忌有心求人多憎愛何須校天賦踈慵不
解愁萬事不關心似水還將生計付沙鷗

過寶應訪朱子价不遇

十年一別問何從此夜維舟又未逢夕照斜翻山帶
閣月明遙聽竹西鐘思君淮海維揚俊媿我江湖汗
漫蹤見說一麾方出守朱雲溪屋白雲封

同家弟訪顧克承

雨過閒行訪辟疆東風茅屋竹圍墻柴扉盡掩知君
出圖畫翻看咲我狂空往不須題鳳字重來還擬續
鱸香茗杯棋局堪忘世不羨當塗日夕忙

自遣

日臨閣帖學羲之時有閒人過問奇非爲避喧成小
築只因踈懶畏趨時貧能尋樂愁俱遣年欲瞞人髮
不私數卷圖書香一縷茶甌初歇試彈碁

京邸移居

明世羞爲失路人 帝城風物自淒清客心又向移
居見歸思偏從逆旅生暫止飛鳥棲未定繞簷晴鵲
報新成飄零卽是羅含宅蔬食鶉衣敢厭貧

朱將軍宅燕集憶忠熙公

寶善堂開倒玉樽綠槐依舊擁朱門不妨垣瓦從殘
草猶見金貂寵後昆細聽歌聲翻白苧獨留月色照
黃昏感恩門下當年客雌伏雄飛幾尚存

穀日立春

帝里慚爲久住人五雲樓閣接楓宸喜占穀日逢晴
日信是看春不當春閒對茗杯元有味老於筆硯益
相親何時覓取歸舟去谷口躬耕學子真

雨中秦評事携酒見過

失意逡巡且未迴強携栖止帝城隈媿將白眼看人
醉愁見黃花冒雨開九日未賡邠老句兩都空負孟
堅才殷勤喜得秦評事携酒衝寒爲我來

嘉靖癸亥舟泊廣陵南充王師出訪留三宿甲

子至日復泊於此王師又留數日今萬曆己卯
至日亦於此繫舟而王師致政已十有一年矣
撫景興懷不能無感

兩度揚州逢至日今逢至日又揚州百年真媿長爲
客一處曾經幾繫舟鄉土不殊人事異天時無改歲
華流廿橋明月人何處撫景興懷滿目愁

元旦不出

傳呼車馬放朝回獨掩衡門晝不開春帖嬾尋詩句
寫辛盤飮候故人來從知白雪難爲和未見黃金再
築臺作伴還家何日是滿園桃李待移栽

自菱湖歸泊峴山月夜泛碧浪湖

雨晴重到峴山前萬頃湖光月在船塔湧奎文移北

斗峯浮螺黛落遙天漁歌遠向煙中起帆影翻從鏡
裏縣酌酒臨風堪寄傲醉來真欲挾飛仙

昆山訪潘子不遇

郭外昆山虛翠屏潘炎別業鬱喬林雲深未辨郎君
谷春半不聞山鳥音小艇蹙維桑塢下重門深瑣草
堂陰去因興盡來乘輿輸却當年泛剡心

夜泊垂虹橋有懷家第

片帆東下向湖州夜泊吳江憶舊游前歲不堪人送
別新年重見月當頭寒侵孤枕回殘夢風引晨鐘到
客舟出處關心慚踳踳天涯鴻鴈動離愁

過江

數載奔馳上國游又携書劍過江頭樓船簫鼓中流

發殿閣煙嵐曙色浮滿目風濤連海嶠一枰棋局報
瓜州同行喜有王摩詰不羨當年李郭舟

申相公過訪

奔走風塵歲月遷卜居人境地應偏蕭齋喜有高軒
過曲巷傳呼駟馬旋公位日尊心愈下吾才元拙志
空堅無聞剡薦雄文似賦就長揚媿有年

附申和韻

漢廷才子競超遷閉戶憐君寂莫偏車有鳴騶還自
媿門無題鳳只空旋凌雲共道長揚就用世寧同大
瓠堅射策公孫休恨晚平津猶及拜恩年

姚少宰以

經筵 賜讌招飲席上口占奉謝

鐘鼓餘聲御講堂論思啓沃侍 明光雍容 日馭
聯南極次第珍盤出 上方列鼎羨君稽古力賜醑
呼我故人嘗大烹推食同姬旦爲誦春風湛露章

附姚和詩

樛材重忝侍 明堂三載長瞻日月光啓沃敢期希
傳說滑稽端不似東方近臣寵渥君休訝謫吏風塵
我備嘗吳苑逕荒頻入夢沐恩難上乞休章

清重誰云白玉堂淺才亦屢荷恩光經陳東壁圖書
富饌出天厨貢物方法酒携歸邀上客入珍入坐媿
先嘗醉來感我茹茅興願以緇衣作講章

徐侍講公望有詩嘲余不歸舟中偶閱唐人春
賦秋還之句因足成之聊以自適非解嘲也

春賦秋還計已違故人咲我獨歸遲空懷鴻鵠志千
里暫假鷓鴣栖一枝出處有關吾道在伶俜還許舊
交知今朝作伴還鄉去真是仙舟晚更移

夢先大父

吾祖頻頻入夢中昨宵有夢又追從提携無異當年
交談咲依然舊日容玉磬音餘桐館靜碧山寒瓊白
雲重覺來枕上飛雙淚月落長安上苑鐘

劉錦衣宅與莫廷韓梅客生李世延得還字

獻書不報又空還點檢行囊早度關會飲金吾投轄
地高燒銀燭照愁顏分題授簡裁新句沉醉翻疑在
故山他日功成如訪我虎丘南畔屋三間

汪學士子聲丈過訪話別

一見故人情自親相逢重別十三春杜陵借榻論文處翰苑懷思入夢頻舉世幾多青眼在舊交猶恐白頭新明朝又向都門別誰是汪倫情最真

趙太史以賜糕分惠兼餽香粳新米

我愛風流文敏公高標玉立意雍容曾投一疏關千古能以危言動九重帶雨遠頒香稻粒賜糕分惠紫駝峯閉門一醉渾無事高卧遙聞禁苑鐘

和杜子庸春雪詩

讀罷故人春雪詩雪花五出覆茆茨自憐冀北非吾土遙憶江南遲爾思回首光迷鳩鵲觀流澌凍解鳳凰池何時覓取歸舟去笠澤溪頭理釣絲

送董刑部之萬全

漢代文章重董生許身元是比南金孤忠何止關軍國一疏真能格帝心邊境遠隨秋鴈去聲名高共暮蟬吟應知不久虛前席詔許還朝雨露深

稽職方雪中招飲縱觀法書名畫

獨坐山齋寒色侵雨絲吹雪擁衡門多情喜得嵇中散折簡來呼文可孫畫出名人題最古香消瓦鼎火猶溫展翻竟日渾忘倦醉後歸來已夕昏

徐州夜泊與白伯望話舊

繫纜南徐洪上頭已同白傅共仙舟一燈聚話當時事數酌能消蒲目愁夜永相將長至候寒深偏重敝貂裘起來醉看中天月曾照當年燕子樓

宿京口客樓

舟行兩月歲將殘
牢落窮途雙鬢寒
數卷圖書投夜宿
一天風雪阻江干
驅馳自媿聞雞舞
不寐重將瘞鶴看
鐵甕城邊黃葉寺
鐘聲依舊出林端

春盡過虎丘竹亭逢王百谷諸友同聽禪誦

三月韶華日換新
一番花事已成陳
閒過竹逕題新句
偶入山房逢故人
誦罷楞巖停拂塵
靜修禪觀寂聞塵
此時正合樊川句
古寺風煙又一春

馮武選正伯携榼過訪次韻一首

新晴初旭射簷楹
數卷圖書一几橫
自喜客來茶正熟
忽聞鳩向竹間鳴
塔縣池沼排山影
風奏松濤隔水聲
君欲問余真樂處
身心安穩夢魂清

得會孫志喜

卜居虎阜近南村
犬護踈籬書掩門
自覺老來容易老
喜聞孫又報生孫
眼看四世家庭慶
架有遺書父祖存
十月江南天氣好
試沽春酒酌金樽

秋興

去歲今朝候駕還
追隨鴛鴦集賢關
九重殿啓迴仙仗
五色雲中覲聖顏
一代盛儀文郁郁
千官鳴珮玉珊珊
歸來獨卧山莊上
半掩柴門水一灣

孫修撰以德夜訪梅花樓因余熟睡而去曉起作詩貽之

雨收月出四山沉
獨擁吳綾入夢魂
高處鐘聲懸碧落
一牀林影過黃昏
毘耶小閣燈初燼
閨苑仙人夜扣門
醉卧不知清露冷
曉看屐齒破苔痕

山深雨濕木綿裘五月如秋卧虎丘訂約愆期虛別
業經旬疑復帶他州邯鄲夢醒君初返漢上衿題我
獨留行樂及時湏記取莫教人訝未真休

真休

蘇公云幾人林下是

初夏晴明家弟子排同從弟子長過余山莊小
酌既登虎丘憇茂林修竹下時黃鳥哢聲山僧
供茗而詠歌言旋宛然春風沂水之樂也徐步
溪頭惟見一川夕照目送歸舟又豈無黯然而
別思哉返卧鷺羣閣恨無詠以紀之次早子排
詩至遂走筆和韻

蘇家兄弟是前身重結今生未了因作伴追游山寺
路乞閒能樂故園春樹陰團盖堪圍坐鳥哢嬌聲解

喚人夕照一川舟去遠還山惟有白雲親

題虎丘梅花樓

昔曾東閣賦梅花此日山樓感歲華滿目羣峯雲萬
疊一林殘雪樹交加風來塔院遙聞磬手汲憨泉試
嚮茶知是英賢舊游地至今題處有籠紗

午門朝見

曾向天門十上書無媒空自待吹噓羞將白髮游燕
市猶着青衫謁帝廬強起彈冠慚貢禹誰憐作賦
似相如 聖王尚少吾年老肯住長安久借居

雪中元老送酒米

彤雲密布雪漫漫擁舊青綾獨自看未得掃門同魏
勃只宜僵卧學袁安香秬分惠來厨傳法酒應知出

大官賦就河東無一薦任教先達咲彈冠

徐侍講送鹿脯

深山昔與鹿同游闌苑今朝薦脯脩
亟問敢云勞孔
伋拜嘉真自媿裴休休有人饋炙鹿辭云疏食
且不足食鹿脯後何以繼長安
往事成蕉夢旅館嚴寒擁麕裘何日得歸尋樂處長
林豐草聽呦呦

得舍弟書至

離家三月苦無書有客來傳愛弟貽秋老鵲鴿栖未
穩天寒鴻鴈到偏遲平安深悞羲之帖消息真傳杜
甫詩更喜阿咸題數字琳琅玉樹悞吾思

送鄒吉甫左遷南比部幕

鄒陽再逐下咸英獨倚孤忠向舊京瑣闥空餘麻草

在高岡無復鳳凰鳴白雲司裏脩封罷玄武湖邊緩
轡行不久天書還內召 聖王知必問蒼生

遣興

一甌新茗玉河泉几上香殘午夢還風墮手書知困
頓鳥鳴簷樹任間關地偏心遠門如水事少官閒日
對山盡道長安塵十丈可容飛到小窻間

放朝出城至署中

旅食長安久未還朝鐘初徹下鷓班 九重天迥迴
仙仗五色雲開靚 聖顏廩祿虛糜慚住久踈慵成
習喜官閒不妨隨例趨朝謁拄笏郊南又看山

秋日早朝值傳羅有感

銀漢沉沉曙色微殘星數點鴈南飛黃羅宸迥金龍

繞翠羽旗翻玉露晞錫命傳宣天語近拜瞻遙接尚
方輝寸心真之絲毫補媿着先朝舊賜衣先祖先教俱有賜衣

志感

慚着烏紗映白頭老年日侍翠雲裘悔從去歲辭家
出強自隨人學宦游滿目風塵思怨鶴一生辛苦媿
眠鷗促歸頻有兒書至好葺茅茨待乞休

袁駕部考績還南都

奏績趨隨右掖垣又乘匹馬向長干從知袁紹名推
重莫咲文同老得官久別蹇逢今又別小寒初過正
嚴寒行行不久天書至召入承明侍禁鑾

內苑

內苑秋深景物清黃金題榜日晶晶龍舟錦纜瓊華

繞羽節紅旂翠殿行萬頃瑤波圖畫色一羣嬌鳥管
絃聲昔年閣直談玄處午夜雲中天樂鳴

獻俘侍班

聖主親臨五鳳樓千官分列擁貔貅鸞簫合奏鈞天
響虎衛森嚴御道周事異魯公居泮水俘同光弼獻
懷州華夷一統昇平盛願誦鏡歌拜 冕旒

夢歸

昨夜西風夢到家不知身尚繫天涯孤身作客渾如
寄愁緒平添亂似麻遙憶故園三徑在回思脩竹萬
竿斜起來霜馬催行處猶整朝衣入 翠華

韓太史再送羊脯

同學如君最妙年優柔雅度玉堂仙文章似昔推韓

愈太史于今媿孟堅
亟饋有勞頌鼎肉
踏蔬無夢媿前賢
感君不忘山陽社
默坐時歌既醉篇

上林齋宿

上苑鐘聲出景陽
玉河橋畔月蒼蒼
鴉栖定喧初息至
夜相將漏更長
自媿衰年通仕籍
強隨鸚侶綴班行
心清元自無塵想
手撥爐灰細續香

思歸

花事闌珊春又殘
好懷無着帶圍寬
故山園上荒三徑
采育村中寄一官
親舊常思難聚晤
兒書時獲報平安
何時早辦歸舟去
半掩柴門竹數竿

乞休

二載趨朝侍
冕旒秋來三疏乞
閒休平生志願終

難遂此日功名念
已收莫道百年過
太半且從三徑任
閒遊歸家自喜身
還健繞膝孫曾咲
白頭

和申相公送行

兩年端笏一微臣
予告今朝解珮簪
無復京華塵滾滾
不聞長樂漏沉沉
回瞻紫闕遠逾遠
歸向青山深更深
從此閉門惟靜坐
有時乘月一微吟

附申相公詩

早學相如賦上林
一官未久竟抽簪
自憐白首耽雲卧
不逐金門混陸沉
松菊長依三徑好
蒹葭獨釣五湖深
倦游我亦思吳苑
惜別那堪更越吟

瀕行以詩見投疊前韻奉答

青衿秣苑舊知音
白首交情重盍簪
君向明時甘寂

莫余慚厚祿尚浮沉閒居自覺風波穩高卧偏知雨
露深遙憶虎丘山寺裏月明誰與共行吟

葺園

園廬重葺近山村寂寂無人晝掩門手植櫻欄看漸
長徑栽松竹喜猶存盤無兼味樽常滿几有餘香火
尚溫正是一番新雨過任教庭砌長苔痕

元旦 丁亥

去歲今朝候掖垣千官鳴珮五更寒山窻此日惟高
卧 天語無聞慶履端拜謁先祠忙盥櫛咲呼兒女
共團圓昨宵有夢居閒樂不到金鑾白玉欄

寄申相公

數載辛勤兩鬢蓬歸來三月又春風恩私圖報愁無

地知己平生獨有公老我自怡三徑樂扁舟時泛五
湖東投閒自識林間趣回首京華是夢中

山亭雨坐

鳴鳩乳燕繞簷飛灌木陰陰結夏幃倚杖去看新水
漫經旬來覺故人稀當年館閣爭求識此日山莊靜
掩扉舊事欲談誰與共一簾梅雨自霏霏

試茶鬻筍欣然一飽喜而賦詩

青山南畔久爲家曲曲陂塘樹樹斜叟供來龍塢
筍山童時焙虎丘茶舊時梁燕營新壘開到薔薇又
落花此日山林聊自適鶴瓢鳩杖足生涯

寓目自遣

梅子肥時雨乍收園林夏五景偏幽池邊翠鳥兼黃

鳥屋上晴鳩喚雨鳩字學永和修禊帖茶傾宣德小
磁甌一生辛苦成何事待得安閒已白頭

嘉禾沈王二憲長過訪

讀罷楞伽掩竹扉山中忽枉故人車共談當日曾游
處回首東風廿載餘見說買山同謝眺還期薦剡似
相如二君方繫蒼生望未許明時儼卜居

園亭

園亭梅雨一番過樂事偏多俗事無蘭蕙筆鈎筇竹
帖羲之書水磨香藝博山鑪一枰棋了茶初熟頃刻花
開酒已酤正欲北窻支枕卧又看池上浴鷗鳧

自遣

開窻四望意欣然插遍新秧綠滿田乍暖又寒芒種

候啓晴還雨熟梅天池邊細浪知魚樂草長平坡看
鳥眠自咲老來生計拙踈慵真適有閒緣

雨晴書懷

一窻晴旭映池塘綠樹成陰覆草堂新竹萬竿鳴珮
玉踈松滿耳奏笙簧光流几簾新鋪地火焙薰籠近
製香如此清閒受清福何須復夢殿東廊

新竹數百竿欲置小樓未就賦詩自遣

綠遍園亭雨乍收籜冠野服稱行游時携拄杖穿紆
徑欲傍新篁着小樓天肯與閒還與健我真無累亦
無求詩逋盡債常堆積興到揮毫倦卽休

晏起

日上山窻猶晏眠起來無事坐茅簷不聞門外催租

吏時泊溪頭問字船飯煮長腰香稻粒魚烹縮項細
鱗鱗鱸薰初燼茶甌歌白石燈明繡佛前

曝背

獨卧山中閱歲華白雲雞犬護桑麻避人只爲身先
嬾曝背因知日易斜數酌舊藏燕市酒一甌新焙小
春茶回思京邸懷歸日不覺年餘已在家

夜榻驚羣閣不寐

卧抱白雲山幾重山深野碓隔溪春世心消滅思酣
睡年力衰遲覺意慵半夜月明漁市鼓五更風動虎
丘鐘江湖十載空奔走乞得歸閒兩鬢鬆

申政府寄書曆至

歸來重葺虎丘居地僻時迴長者車喜見春王新歲

曆欣看厚祿故人書公孫延士猶開閣玄晏窮愁自
閉廬莫問踈慵只如昨文園終合卧相如

虎山橋玩月

光福西來水繞盤虎山橋月在林端霏霏細霧人初
散拍拍新醅酒亦寒石塔影斜生夜氣盡船停處起
微瀾分明一幅南宮景正好蓬窻倚檻看

溪雲閣爲歐陽子賦

歐陽曾築醉翁亭白下雲孫寄一楹新水平添桃葉
渡飛雲常繞石頭城沿流夕照堪垂釣隔浦涼生唱
濯纓書卷茗薰消永晝秦淮原不讓蓬瀛

春日書懷

山園雨過徑如酥倚杖行游不用扶載酒船停人問

字賣花聲歇鳥提壺醉圍紅袖閒揮酒嬾畫青山有
積迥鷓鴣一雙飛並浴滿池新水長新蒲

玉蘭堂卽事

玉蘭堂坐靜無譁小盃閩蘭着數花載得寶華山上
水試烹羅峽雨前茶手揮玉麈棋聲歇風動湘簾竹
影斜投老身閒心亦靜喜無塵土是京華

過石蓮莊

拂衣歸卧虎丘居嘗憶吳淞江水湄不到石蓮經歲
久重來岸柳綠陰垂眼前田畝皆新主村上人家異
昔時獨有當年垂釣處至今橋伴有茆茨

自適

虛堂高敞四垂簾散髮濡毫學素顛菰首作羹供午

餉簾牀支枕且安眠近於世味看來澹久悟玄機覺
有緣一事不關心似水鑪薰茗碗自年年

雨過書懷

一番雨過樹扶疎湘簟生涼竹榻虛心靜不關身外
事睡酣時墮手中書齋頭橫設天然几門外頻還長
者車數載京華塵似海何如今日誦閒居

七夕

抱病忽經三十日開簾驚見月垂鈎雙星又向河梁
度獨卧遙聞笛韻悠雨過蕭齋涼思襲夢回虛枕簾
紋流追思白首承歡處腸斷西風十五秋

虞山桃花澗

海虞山與白雲齊萬樹桃花古澗磳漫往慚非晨肇

葦沿流疑入武陵溪前村小塢聞雞犬作伴隨身少
鹿麕共領夕陽奇絕處青帘斜映畫橋西

中秋夜見月華

橫笛墻東三兩聲閒庭獨坐晚涼生九秋今夜平分
處圓月當空幾倍明風斂卿雲呈五色漏催銀箭已
三更洗杯更酌登樓望撫景懷人無限情

初冬讀趙文敏公詩可愛追次其韻

雨歇雲輕漏日光庭前橙橘已經霜故人遠寄新頒
曆瓦鼎時焚內府香自覺心閒身亦健何妨晷短夜
偏長興來秉燭窻前坐隨意欣然榻硬黃

附文敏詩

平生詩句領流光絕愛初冬萬瓦霜楓葉欲殘看逾

好梅花未動意先香暮年自適何妨退晚景無營亦
是長况有小兒同此趣一窻相對弄朱黃

借榻楞伽寺對上人房

奔馳久不到楞伽來入山中日又斜淨室焚香僧入
定雨窻閒話燭生花百年心事三更夢十載江湖兩
鬢華依舊鐘聲禪榻畔曉催新汲試烹茶

次韻答張孟孺

我歸林下歲將終君獨承恩出漢宮喜有高才同子
建無心執戟侍楊雄豈難勲業凌烟上只欲精研書
史中惠我驚人詩句好興懷長悒故人風

春來久雨窻前石菖蒲忽開數花采供繡佛齋
雨晴新綠上窻紗石上昌陽着九花靄靄輕浮雲欲

動盈盈清淺水參差摘來服食依仙傳供向山齋閱
歲華歸老心閒無俗慮一燈相對禮毘耶

除夕 丁亥

窮冬快雪喜時晴乞得歸閒一老身繞膝孫曾娛晚
景圍爐樽酒守庚申今宵歲次將更候明日年華是
七旬秉燭酣歌須達旦早裁詩句慶新春

文錄事詩集

文錄事詩

上林錄事文 肇祉 基聖

五言絕句

春日

雨餘春水漲岸岸溪流平玄鳥今朝至倉庚樹底鳴

舟中曉望

夜泊葑溪上朝過黃石橋波光浮瀲灩紅日起層霄

新燕

燕來營舊壘簷底雙雙語柳絮舞閒庭杏花三月雨

江樓聞笛

閒居人事少獨坐小樓中五月江深處梅花落晚風

晚眺

一望江天濶風生蘆荻洲平沙羣鴈落天際有歸舟
十月

昨夜朔風寒今朝雪花舞起來盟櫛餘倏忽日過午
楞伽寺

楞伽湖上寺修竹萬竿斜禪誦方初定空中散雨花
石湖莊

卜築越來溪問是王猷室默默娛道言墻頭露山色
袁氏列岫樓

袁安結層樓庭植千竿竹遠岫列窻中人占丈人屋
西莊

西莊鄰古寺紅杏出墻頭吳驕馬嘶金勒成羣作冶游
雞鳴山

獨倚憑虛閣紅樓映日開忘機雙白鶴閒步啄蒼苔
秣陵秋色

水深桃葉渡溪上晚潮生岸幘樓頭望蒹葭落日明
漂母祠

淮陰古驛西溪上有荒祠一飯王孫後芳名千古垂
分水龍王廟

廟貌神龍古徂徠據上游泉源七十二南北水分流
黃金臺

追想燕昭意懸金結士心當時四至士豈盡為黃金
盧溝曉月

盧溝缺月升野店早雞鳴不見人行蹟惟聞車馬聲
金臺夕照

盧溝缺月升野店早雞鳴不見人行蹟惟聞車馬聲
金臺夕照

落日閣西山晚霞呈五色倒影入廟中樓臺燦金碧
西山玉泉亭

湖暎玉泉西泉亭傍石磯呂公祠洞古耶律楚材題
署中自遣

老作宦游人荒村寄一身鳥啼花亂落又是一年春
致政

貪位懷百憂何如歸去好莫嫌得官遲但願休官早
山莊

歸卧虎丘莊無縈日自長雪深人蹟少温火煮茶香
春雨遣懷

細雨又春分魚吹水面紋一般啼鳩鳥不是上林聞
雨中登虎丘

春陰連一月啼鳥怨東風一望劍池上樓臺煙雨中
曉山

缺月已流西登臺入翠微四山空翠滴露下濕人衣
中秋夜虎丘翫月

歌聲合簫管明月正當頭醉倚千人石山僧供茗甌
雪霽登山

雪晴山寺寂携酒一凭闌悟石軒前望瓊樓玉宇寒
林居自述

歸老意安閒暮年聊自適靜坐竹窻中一日如兩日
六言絕句

十二月

端月上元將近高燒銀燭傳卮酒醒滿庭明月雪殘

寒勒梅枝

陰雨春分時候柳塘水綠如油燕子歸尋舊壘杏花
開滿牆頭

今日正逢穀雨呼童試焙新茶池上數株垂柳水邊
開遍桃花

雨過清和時節牀頭蠶已三眠柳絮漫空作雪沼中
荷葉田田

夏五葵榴滿目昨朝已過端陽雨歇一番涼思家家
插遍新秧

炎暑蒸人如甌荷亭拂拭桃笙門外寂無車馬卧聽
高柳蟬鳴

昨日金風乍起今宵大火西流卧看牽牛織女歡娛

又一年秋

雨霽中秋氣爽今宵明月當頭山上游人如蟻盡船
簫鼓中流

去歲賜糕闕下今宵歸卧山莊記得潘邠詩句滿城
風雨重陽

霜落溪邊蘆葦初冬紫蟹輸芒新釀牀頭酒熟山莊
稻已登塲

忽報仲冬時令喜逢至日陽生回視車塵馬足何如
几淨窻明

臘月午門賜燕歸來高卧繩牀又是一年盡茅簷
竹几焚香

七言絕句

雪晴

茅簷晴旭減寒威
軋雪隨風上竹扉
漏泄春光占柳色
爭枝啄雀墜驚飛

白頭鳥爭枝

落日西風竹樹幽
閉門閒坐自悠悠
一雙小鳥爭飛墜
老不相知媿白頭

菴盡溪

短棹輕舟菴盡中
春深花片滿溪紅
眼前只少漁郎引
疑有桃源路可通

又

陽羨羣山紫翠重
山迴路轉一溪通
沿流點筆翻成畫
不道身先在畫中

鳳凰臺懷古

鳳去臺空玉樹殘
登臺一望俯長干
秦人誰識千年後
終古皇畿奠石盤

春

日煖茅簷燕影翻
墻頭一樹杏花繁
盡垂簾幙栽新句
何處鞦韆笑語喧

新夏

自掃松枝試煮茶
四簷新綠映窗紗
剛思無計留春住
又見翻堦紅藥花

綠牡丹

姚黃魏紫鬪鮮新
獨此名花占晚春
若使移從金谷裏
倚闌疑是墮樓人

過金山

獻賦留都四度虛扁舟空又載琴書舉頭媿望江天閣只恐名山亦咲余

江上小亭雨坐

吳淞江上雨霏微雨過江邊隱隱雷愛得遠天雙白鶴青山掩映却飛回

丹陽道中

上書無路達承明又向丹陽郭裏行買得小舟風又逆整依村野待潮生

與杜與言談秣陵秋意

夕花開向晚風前花近黃昏香更妍記得長干行樂處紗幘月伴玉人眠

江頭晚眺

十月江南鱸鰖肥新春晚稻帶香炊欣然一飽江頭望楓落前村露酒旗

親友送別

東風拂拂柳千條客路三千去更迢再把一杯行色酒片帆風雨過楓橋

杜玄慶齋供盆蘭餅梅可愛各圖一幅貽之

幽蘭空谷萬千叢何似新栽小盎中一蕊二花三四葉分明一幅所南翁

折得梅枝蠡蘚斑古餅瓊蕊勒春寒夜來無限相思發點筆畚成畫裏看

春書

柳花飛舞上簾旌春煖池塘魚子生獨坐小窻無客
至桑間戴勝兩三聲

玉河春色

東風御柳萬株斜白玉河邊暎曉霞報道今年春色
早日邊紅杏已開花

十五夜出塲

棘闈十度鎖重門擊柝聲中欲斷魂文字五千初寫
就冷風吹月又黃昏

舟中望太白樓

昔年曾此醉中豪太白危樓百尺高今夜扁舟空悵
望依然月色照官袍

舟中望曉霞

熙微曉色碧天澄帆帶青山樹裏行好是楞伽湖畔
寺上方茶磨列蒼屏

鷺

水田漠漠鷺成羣風裊寒絲靜不驚何事衝煙忽飛
去青山時見白雲生

舟過桃源夢故妻

伯鸞時憶孟光賢夢裏重逢淚自潸二十四年長別
後誰知猶是布衣還

清河口

昔年河口水橫下百丈難牽上水舟今日歸來非舊
路布帆無恙自安流

舟次儀真有感

歸帆數幅又真州記得隨親送北游回首秋光逾七
載傷心滿把淚交流

京口

北固山圍鐵甕城又携書劍度江濱寄言關吏無須
問不是棄繻終子雲

雪夜不寐

雨雪霏霏卧擁裯篝燈獨自數更籌樊川詩句關吾
意未見功名已白頭

自嘆

劉向傳經苦自知南圖北走媿奔馳塲中三十餘三
日博得星星兩鬢絲

得官有感

辛苦奔馳四十年今朝一命拜園官可憐薄祿縻人
得從此紅塵撲馬鞍

趙邑博仁甫會試

瘦馬西風古道斜送君回首各天涯種成桃李門墻
盛又向長安看杏花

釣鰲處

秋風吹雨晝陰陰畫舫青簾映遠林俛仰舊游興感
慨百年空負釣鰲心

歸山莊有感

歸來重卧虎丘莊浩蕩君恩不敢忘坐享餘年娛
晚景答天惟有淨焚香

聞蛙

年來卜築虎丘莊日夜笙歌到耳
夜莫道貧家無鼓吹蛙聲也自開池塘

貫酒

虎阜山前屋數椽赤欄橋下塔斜懸
偶思小飲沽村釀晚市魚蝦正泊船

過元上人山房

禪房寂寂長苔紋蘿薜陰陰鎖白雲
試剪芭蕉如貝葉研朱點露寫經文

歸來

歸老重修塔影園花能含笑鳥能言
只求身靜心安好不羨門前車馬喧

洗硯

池邊柳色淡鶯黃雨過雲行漏日光
睡起呼童頻洗硯一泓春水墨花香

沈道人索書

千古鶯羣說右軍山陰道士愛黃庭
沈休亦欲籠鶯至爲寫淮南相鶴經

索字

几淨窻明照繭光日臨閣帖晉諸王
今朝博得門如市也勝傭書日幾行

送友人

綠樹溪邊日暮雲片帆無繫帶斜曛
明朝三月逢三十未送春歸先送君

鶯羣閣

鷺羣閣下水泠泠坐見青山上畫屏午睡起來無客
至自臨南牖榻黃庭

朱汝脩送貝葉

貝葉經文一卷餘故人惠我供齋居芭蕉試剪番新
樣滴露研硃手自書

反舌

年來月令也無憑五月枝頭反舌鳴萬語千言爲誰
訢攪余殘夢不分明

林堂獨坐

山中九月下霜華楓葉紅於二月花坐愛林堂幽趣
好焚香拂几讀楞伽

張伯起畜鴛鴦數十於池客來呼之卽至

自昔羲之與魯望羣鷺鬪鴨滿春江清河公子無他
好池上鴛鴦三十雙

新柳

陌上東風嘶紫騮淡鷺黃色弄輕柔去年此日長安
道萬縷煙條拂御溝

二月

二月園林雨乍晴茅簷初旭映窻明東風吹綠溪邊
草桑柘葉青蠶子生

泊閭潮館

舟泊溪頭夢不成忽聞雲裏度鐘聲起來自倚蓬窻
看夜半月明朝未平

讀南華

開遍桃花柳拂煙鴛鴦日煖傷沙眠焚香靜坐心如
洗細看莊周齊物篇

對奕

水閣新鋪枕簟涼煖風吹送芰荷香客來解帶簾前
坐棋局閒消白晝長

新秋聞蛩

昨夜秋聲起樹間早看梧葉滿庭前一畚細雨生涼
思繞砌蛩聲到枕邊

題卧雪圖

袁安僵卧畏千人車馬臨門耐問情當日史官何忘
事洛陽令尹不書名

文錄事詩





